

ATODLEN 3

Rheoliadau 13, 15 a 30

Y gweithdrefnau sydd i'w dilyn gan Fyrddau Iechyd
Lleol i benderfynu ceisiadau o dan y Rheoliadau

RHAN 1

Materion rhagarweiniol

Egwyddorion cyffredinol

1.—(1) Ac eithrio i'r graddau y mae'r Rheoliadau hyn yn darparu i'r gwrthwyneb, caiff Bwrdd Iechyd Lleol benderfynu cais a gyflwynir iddo yn y modd y mae'n meddwl ei fod yn addas.

(2) Rhaid i Fwrdd Iechyd Lleol ddilyn y weithdrefn yn rheoliad 15(4) mewn cysylltiad â chais a gyflwynir iddo nad yw'n cynnwys yr holl wybodaeth y mae'n ofynnol i geisydd ei darparu yn unol ag Atodlen 2.

(3) Caiff Bwrdd Iechyd Lleol, os yw'n meddwl ei bod yn addas, ystyried dau neu ragor o geisiadau ar y cyd ac mewn perthynas â'i gilydd, ond pan fo'n bwriadu gwneud hynny rhaid iddo roi hysbysiad ysgrifenedig o'r bwriad hwnnw i'r canlynol—

- (a) pob ceisydd unigol, a
- (b) pan fo'r cais yn un y mae rhaid rhoi hysbysiad mewn cysylltiad ag ef o dan baragraff 8, unrhyw berson arall y mae rhaid rhoi hysbysiad o'r cais hwnnw iddo.

(4) Pan fo Bwrdd Iechyd Lleol, yn unol ag is-baragraff (3), yn ystyried dau neu ragor o geisiadau y mae rheoliad 16(2) yn gymwys iddynt ar y cyd ac mewn perthynas â'i gilydd, caiff wrthod cais (er y byddai, pe bai'n penderfynu'r cais fel cais unigol ar ei ben ei hunan, yn ei ganiatáu) pan fo nifer y ceisiadau, neu'r amgylchiadau y'u gwneir odanynt, yn peri y byddai caniatáu pob un, neu fwy nag un, ohonynt yn niweidio darpariaeth briodol gwasanaethau meddygol sylfaenol, gwasanaethau fferyllol neu wasanaethau gweinyddu yn yr ardal reoledig y mae'r fangre a bennir yn y cais ynddi.

Yr amserlen ar gyfer penderfynu ceisiadau

2. Rhaid i Fwrdd Iechyd Lleol ymdrechu i benderfynu cais cyn gynted ag y bo'n ymarferol ar ôl ei gael.

Personau a waherddir rhag cymryd rhan mewn penderfyniadau ar geisiadau

3.—(1) Nid yw unrhyw berson i gymryd rhan mewn penderfynu cais os yw—

- (a) yn berson sydd wedi ei gynnwys yn y rhestr fferyllol neu restr meddygon fferyllol a gynhelir gan y Bwrdd Iechyd Lleol neu'n gyflogai i berson o'r fath,
- (b) yn gyfranddaliwr, yn gyfarwyddwr neu'n ysgrifennydd i gwmni sy'n cynnal busnes fferyllfa fanwerthu yn ardal y Bwrdd Iechyd Lleol,
- (c) yn ddarparwr gwasanaethau meddygol sylfaenol yn ardal y Bwrdd Iechyd Lleol,
- (d) yn gontractwr GMDdA yn ardal y Bwrdd Iechyd Lleol, neu'n swyddog, yn ymddiriedolwr neu'n berson arall sy'n ymwneud â rheoli cwmni, cymdeithas neu sefydliad gwirfoddol neu gorff arall sy'n gontractwr GMDdA, neu sydd wedi ei gyflogi neu wedi ei gymryd ymlaen ymlaen gan gontractwr GMDdA o'r fath, neu
- (e) yn gyflogedig, neu wedi ei gymryd ymlaen, gan y Bwrdd Iechyd Lleol at ddibenion darparu gwasanaethau meddygol sylfaenol o fewn practis GMBILL.

(2) Nid yw unrhyw berson arall i gymryd rhan mewn penderfynu cais pe bai ei gyfranogiad, oherwydd buddiant neu gysylltiad sydd ganddo, neu oherwydd pwysau y gellid ei roi arno, yn peri amheuaeth resymol o ragfarn.

RHAN 2

Penderfynu ardaloedd lleol rheoledig

Hysbysu ynghylch bwriad i wneud penderfyniad mewn cysylltiad ag ardaloedd rheoledig

4.—(1) Os yw Bwrdd Iechyd Lleol, yn rhinwedd rheoliad 13(3) (ardaloedd sy'n ardaloedd rheoledig), yn penderfynu na ellir ystyried cais gan Bwyllgor Meddygol Lleol neu Bwyllgor Fferyllol Lleol, rhaid i'r Bwrdd Iechyd Lleol beidio â chymryd unrhyw gam gweithredu mewn perthynas â'r cais hwnnw, ac eithrio hysbysu'r ceisydd am y ffaith honno ac am ei hawl i apelio yn erbyn y penderfyniad hwnnw o dan reoliad 14 (apelau).

(2) Ym mhob achos arall, cyn gwneud penderfyniad o dan reoliad 13(2), rhaid i Fwrdd Iechyd Lleol roi hysbysiad ysgrifenedig o'i fwriad i wneud penderfyniad i'r canlynol—

- (a) y Pwyllgor Meddygol Lleol yn ei ardal,
- (b) y Pwyllgor Fferyllol Lleol yn ei ardal,
- (c) y Cyngor Iechyd Cymuned ar gyfer yr ardal, a
- (d) unrhyw berson sydd wedi ei gynnwys mewn rhestr fferyllol a gynhelir gan y Bwrdd Iechyd Lleol ac unrhyw ddarparwr gwasanaethau fferyllol lleol o dan gynllun peilot neu unrhyw ddarparwr gwasanaethau meddygol sylfaenol yn yr ardal y sefydlwyd y Bwrdd Iechyd Lleol ar ei chyfer, y gall y penderfyniad effeithio arno ym marn y Bwrdd Iechyd Lleol.

(3) Rhaid i hysbysiad o fwriad i wneud penderfyniad roi gwybod i'r person a hysbysir fod hawl ganddo i gyflwyno sylwadau (neu, os hysbysir Pwyllgor Meddygol Lleol neu Bwyllgor Fferyllol Lleol a wnaeth gais am y penderfyniad, unrhyw sylwadau pellach) yn ysgrifenedig ynglŷn â'r penderfyniad arfaethedig, o fewn 30 o ddiwrnodau i'r dyddiad yr anfonwyd yr hysbysiad ato.

Gohirio ceisiadau

5. Pan fo Bwrdd Iechyd Lleol wedi dyroddi hysbysiad o fwriad i wneud penderfyniad, rhaid iddo ohirio ystyried unrhyw gais a gyflwynwyd o dan Ran 5 neu Ran 6 o'r Rheoliadau hyn ond nas penderfynwyd ganddo, os yw'r cais yn un y gallai'r bwriad i wneud penderfyniad effeithio arno—

- (a) hyd nes iddo benderfynu a yw'r ardal leol yn ardal reoledig neu'n rhan o ardal reoledig ai peidio, a bod y cyfnod ar gyfer dwyn apêl yn erbyn y penderfyniad hwnnw wedi dod i ben, neu
- (b) dyddiad penderfynu unrhyw apêl o'r fath.

Gosod amodau

6. Pan fo Bwrdd Iechyd Lleol yn penderfynu a yw unrhyw ardal benodol, o fewn yr ardal y'i sefydlwyd ar ei chyfer, oherwydd ei chymeriad gwledig, yn ardal reoledig neu'n rhan o ardal reoledig ai peidio—

- (a) rhaid iddo ystyried a yw'n debygol yr effeithir yn andwyol ar ddarpariaeth—
 - (i) gwasanaethau meddygol sylfaenol gan ddarparwr gwasanaethau o'r fath (ac eithrio'r Bwrdd Iechyd Lleol ei hunan),
 - (ii) gwasanaethau fferyllol gan fferyllydd GIG neu gontractwr cyfarpar GIG,

- (iii) gwasanaethau fferyllol lleol a ddarperir o dan gynllun peilot, neu
 - (iv) gwasanaethau fferyllol gan feddyg,
- o ganlyniad i'r penderfyniad hwnnw, a
- (b) caiff, pan fo o'r farn ei bod yn debygol yr effeithir yn andwyol ar unrhyw un neu ragor o'r gwasanaethau hynny, osod amodau i ohirio, am unrhyw gyfnod y mae'n meddwl ei fod yn addas, wneud neu derfynu trefniadau o dan reoliad 26 (trefniadau ar gyfer darparu gwasanaethau fferyllol gan feddygon), neu ddarpariaeth gyfatebol o dan y Rheoliadau GMC ar gyfer darparu gwasanaethau fferyllol neu wasanaethau gweinyddu gan feddyg neu gontractwr GMC i gleifion ar y rhestr cleifion berthnasol.

Hysbysu ynghylch penderfyniadau a gweithredu yn dilyn penderfyniadau

7.—(1) Unwaith y bydd Bwrdd Iechyd Lleol wedi penderfynu'r cwestiwn o ran pa un a yw unrhyw ardal benodol, o fewn yr ardal y'i sefydlwyd ar ei chyfer, oherwydd ei chymeriad gwledig, yn ardal reoledig neu'n rhan o ardal reoledig ai peidio, rhaid iddo—

- (a) cyn gynted ag y bo'n ymarferol ar ôl gwneud penderfyniad, roi hysbysiad ysgrifenedig i'r rheini a hysbyswyd o dan baragraff 4(2) i roi gwybod iddynt am y canlynol—
 - (i) y penderfyniad a'r rhesymau drosto,
 - (ii) unrhyw amodau a osodwyd ganddo o dan baragraff 6, a
 - (iii) unrhyw hawliau i apelio o dan Atodlen 4, a
 - (b) cyn gynted ag y bo'n ymarferol ar ôl y dyddiad perthnasol—
 - (i) amlinellu ffiniau'r ardal reoledig yn fanwl gywir ar fap, neu ddileu'r amlinelliad o ffin ardal leol sydd wedi peidio â bod yn ardal reoledig,
 - (ii) rhoi cyfnod rhesymol o rybudd i feddyg yr effeithir arno ynghylch unrhyw amodau sydd wedi eu gosod o dan baragraff 6 o ganlyniad i'r penderfyniad, a
 - (iii) mynd ymlaen i benderfynu unrhyw geisiadau sydd wedi eu gohirio o dan baragraff 5.
- (2) At ddibenion y paragraff hwn, "y dyddiad perthnasol" yw'r diweddaraf o'r canlynol—
- (a) y dyddiad y mae'r cyfnod ar gyfer dwyn apêl yn erbyn y penderfyniad yn dod i ben, neu
 - (b) dyddiad penderfynu unrhyw apêl o'r fath.

RHAN 3

Ceisiadau i gynnwys person mewn rhestrau fferyllol a rhestrau meddygon fferyllol, neu i ddiwygio rhestrau o'r fath

Hysbysu ynghylch ceisiadau penodol

- 8.—(1) Mae'r paragraff hwn yn gymwys i geisiadau i—
- (a) cynnwys person yn y canlynol, neu ddiwygio'r canlynol—
 - (i) rhestr fferyllol a wnaed o dan Ran 5 o'r Rheoliadau hyn, ac eithrio ceisiadau o dan reoliad 22 (ceisiadau sy'n ymwneud â newid perchnogaeth), a
 - (ii) rhestr meddygon fferyllol a wnaed o dan Ran 6 o'r Rheoliadau hyn;
 - (b) estyn y cyfnod perthnasol o dan reoliad 24, ac
 - (c) penderfyniad pellach o ran a yw mangre neu leoliad perthnasol mewn lleoliad neilltuedig o dan reoliad 17(2).

(2) Rhaid i'r Bwrdd Iechyd Lleol y cyflwynwyd y cais iddo roi hysbysiad ysgrifenedig o'r cais yn unol â pharagraff 9.

(3) Caiff y rheini a hysbyswyd am gais, o fewn 30 o ddiwrnodau i'r dyddiad yr anfonwyd yr hysbysiad atynt, gyflwyno sylwadau ysgrifenedig ar y cais i'r Bwrdd Iechyd Lleol y cyflwynwyd y cais iddo, ac eithrio ceisiadau a wnaed yn unol â rheoliad 21 (ceisiadau sy'n ymwneud ag adleoli dros dro).

Personau a chyrrff sydd i'w hysbysu

9.—(1) Y personau a'r cyrrff y mae rhaid i Fwrdd Iechyd Lleol eu hysbysu yw—

- (a) y Pwyllgor Fferyllol Lleol,
- (b) y Pwyllgor Meddygol Lleol,
- (c) unrhyw berson—
 - (i) sydd wedi ei gynnwys mewn rhestr fferyllol a gynhelir ganddo, neu
 - (ii) y rhoddwyd cydsyniad rhagarweiniol iddo i'w gynnwys mewn rhestr fferyllol, y gallai caniatáu'r cais, ym marn y Bwrdd Iechyd Lleol, effeithio'n sylweddol ar ei fuddiannau,
- (d) unrhyw ddarparwr gwasanaethau fferyllol lleol o dan gynllun peilot yn yr ardal y sefydlwyd y Bwrdd Iechyd Lleol ar ei chyfer, y gallai caniatáu'r cais, ym marn y Bwrdd Iechyd Lleol, effeithio'n sylweddol ar ei fuddiannau,
- (e) unrhyw Gyngor Iechyd Cymuned sy'n gwasanaethu ardal y Bwrdd Iechyd Lleol,
- (f) unrhyw grŵp cleifion, grŵp defnyddwyr neu grŵp cymunedol yn ardal y Bwrdd Iechyd Lleol y mae'n ystyried ei fod â buddiant sylweddol yn narpariaeth gwasanaethau fferyllol yn yr ardal,
- (g) pan fo'r fangre a bennir yn y cais mewn ardal reoledig, unrhyw berson (ac eithrio'r Bwrdd Iechyd Lleol ei hunan) sy'n ddarparwr gwasanaethau meddygol sylfaenol o fewn ardal y Bwrdd Iechyd Lleol, neu sydd wedi ei gynnwys yn y rhestr meddygon fferyllol a gynhelir gan y Bwrdd Iechyd Lleol, ac y gallai caniatáu'r cais, ym marn y Bwrdd Iechyd Lleol, effeithio'n sylweddol ar ei fuddiannau,
- (h) unrhyw Fwrdd Iechyd Lleol neu gorff cyfatebol sydd ag unrhyw ran o'i ardal o fewn 2 gilometr i'r fangre, neu i leoliad y fangre, a bennir yn y cais, ac
- (i) yn achos cais a wnaed o dan reoliad 20 (ceisiadau sy'n ymwneud ag adleoli rhwng ardaloedd Byrddau Iechyd Lleol cyfagos), y Bwrdd Iechyd Lleol y mae'r ceisydd yn dymuno adleoli o'i ardal.

(2) Rhaid i Fwrdd Iechyd Lleol a ddarparodd yr hysbysiad o dan is-baragraff (1)(h)—

- (a) o fewn 14 o ddiwrnodau i gael yr hysbysiad, roi hysbysiad ysgrifenedig i'r personau a'r cyrrff a bennir yn is-baragraff (1)(a) i (g) sydd o fewn yr ardal y sefydlwyd y Bwrdd Iechyd Lleol ar ei chyfer, neu sy'n gwasanaethu'r ardal honno, a
- (b) hysbysu'r Bwrdd Iechyd lleol a ddarparodd yr hysbysiad o dan is-baragraff (1) ei fod wedi darparu'r hysbysiad sy'n ofynnol gan is-baragraff (2)(a).

(3) Caiff corff cyfatebol a hysbysir o dan is-baragraff (1)(h) ofyn i'r Bwrdd Iechyd Lleol roi hysbysiad i'r personau hynny, yn yr ardal y sefydlwyd y corff cyfatebol ar ei chyfer, y gallai caniatáu'r cais, ym marn y corff cyfatebol, effeithio'n sylweddol ar eu buddiannau, a rhaid i'r Bwrdd Iechyd Lleol gydymffurfio ag unrhyw ofyniad o'r fath.

Cynnwys hysbysiad

10. Rhaid i hysbysiad o gais o dan baragraff 8—

- (a) rhoi gwybod i'r person neu'r corff a hysbysir—
 - (i) am ei hawl i gyflwyno sylwadau ar y cais o dan baragraff 8(3),
 - (ii) am yr amgylchiadau y caiff y Bwrdd Iechyd Lleol ei gwneud yn ofynnol i wrandawriad llafar gael ei gynnal odanynt o dan baragraff 11, a
 - (iii) os yw'r Bwrdd Iechyd Lleol yn bwriadu ystyried y cais ar y cyd ag unrhyw gais arall ac mewn perthynas ag unrhyw gais arall, am y bwriad hwnnw,
- (b) darparu copi o'r cais a gyflwynwyd gan y ceisydd, i alluogi'r person neu'r corff a hysbysir i gyflwyno sylwadau gwybodus o ran pa un a ddylid caniatáu'r cais ai peidio, ac
- (c) pan fo rheoliad 17(1) yn gymwys i gais o dan baragraff 8(1)(a), roi gwybod i'r person neu'r corff a hysbysir y bydd y Bwrdd Iechyd Lleol yn penderfynu a yw'r fangre neu'r lleoliad perthnasol, a bennwyd yn y cais ac sydd mewn ardal reoledig, hefyd mewn lleoliad neilltuedig.

Gwrandawriadau llafar

11.—(1) Yn achos cais sy'n dod o fewn paragraff 8, caiff Bwrdd Iechyd Lleol ei gwneud yn ofynnol i wrandawriad llafar gael ei gynnal os yw'n ystyried bod angen clywed sylwadau llafar cyn penderfynu cais o'r fath.

- (2) Os yw'r Bwrdd Iechyd Lleol yn penderfynu cynnal gwrandawriad llafar, rhaid iddo—
 - (a) rhoi dim llai na 14 o ddiwrnodau o rybudd o amser a lleoliad y gwrandawriad i'r canlynol—
 - (i) y ceisydd, a
 - (ii) unrhyw berson sydd wedi cyflwyno sylwadau ar y cais o dan baragraff 8(3),
 - (b) rhoi gwybod i'r ceisydd pwy y rhoddwyd hysbysiad iddo o'r gwrandawriad, ac
 - (c) rhoi gwybod i'r rheini a hysbysir y cânt gyflwyno sylwadau llafar yn y gwrandawriad, ynglŷn â'r cais.

(3) Caniateir i unrhyw berson a grybwyllir yn is-baragraff (2), sy'n dymuno cyflwyno sylwadau llafar yn y gwrandawriad, gael ei gynorthwyo i gyflwyno ei sylwadau gan berson arall a chael ei gynrychioli yn y gwrandawriad gan y person arall hwnnw, gan gynnwys pan na fo'r person a hysbysir o dan is-baragraff (2) yn gallu bod yn bresennol ei hunan yn y gwrandawriad.

(4) Caiff Bwrdd Iechyd Lleol benderfynu'r weithdrefn sydd i'w dilyn yn y gwrandawriad llafar.

(5) Nid yw Bwrdd Iechyd Lleol wedi ei rwymo gan unrhyw argymhellion sy'n codi o wrandawriad llafar.

Gwybodaeth y mae rhaid i Fwrdd Iechyd Lleol roi sylw iddi

12. Wrth benderfynu cais sy'n dod o fewn paragraff 8, rhaid i Fwrdd Iechyd Lleol roi sylw, yn benodol, i'r canlynol—

- (a) unrhyw sylwadau a gaiff y Bwrdd Iechyd Lleol o dan baragraff 8(3),
- (b) unrhyw argymhellion sy'n codi o wrandawriad llafar, os cynhelir un o dan baragraff 11,
- (c) yr asesiad perthnasol o anghenion fferyllol a'r ardal leol berthnasol, a
- (d) unrhyw wybodaeth arall sydd ar gael i'r Bwrdd Iechyd Lleol ac sydd, yn ei farn, yn berthnasol i'r ystyriaeth o'r cais.

Gosod amodau

13.—(1) Mae'r is-baragraff hwn yn gymwys pan fo Bwrdd Iechyd Lleol yn penderfynu caniatáu cais sy'n dod o fewn—

- (a) paragraff 8(1)(a)(i) pan fo'r fangre a bennir yn y cais mewn ardal reoledig, neu
 - (b) paragraff 8(1)(a)(ii).
- (2) Pan fo is-baragraff (1) yn gymwys—
- (a) rhaid i Fwrdd Iechyd Lleol ystyried a yw'n debygol yr effeithir yn andwyol ar ddarpariaeth—
 - (i) gwasanaethau meddygol sylfaenol gan ddarparwr gwasanaethau o'r fath (ac eithrio'r Bwrdd Iechyd Lleol ei hunan),
 - (ii) gwasanaethau fferyllol gan fferyllydd GIG neu gontractwr cyfarpar GIG,
 - (iii) gwasanaethau fferyllol lleol a ddarperir o dan gynllun pilot, neu
 - (iv) gwasanaethau fferyllol gan feddyg,
 o ganlyniad i'w benderfyniad i ganiatáu'r cais, a
 - (b) pan fo'r Bwrdd Iechyd Lleol o'r farn ei bod yn debygol yr effeithir yn andwyol ar ddarpariaeth unrhyw un neu ragor o'r gwasanaethau hynny a restrir yn is-baragraff (2) (a), caiff osod amodau i ohirio, am unrhyw gyfnod y mae'n meddwl ei fod yn addas, wneud neu derfynu trefniadau o dan reoliad 26 (trefniadau ar gyfer darparu gwasanaethau fferyllol gan feddygon) neu ddarpariaeth gyfatebol gan feddyg neu gontractwr GMC o wasanaethau fferyllol neu wasanaethau gweinyddu i gleifion ar y rhestr berthnasol.

Hysbysu ynghylch penderfyniadau: ceisiadau i gynnwys person mewn rhestr fferyllol neu i ddiwygio rhestr fferyllol

14.—(1) Rhaid i Fwrdd Iechyd Lleol, cyn gynted ag y bo'n ymarferol ar ôl gwneud penderfyniad ar gais sy'n dod o fewn paragraff 8(1)(a)(i), roi hysbysiad ysgrifenedig o'i benderfyniad (gan gynnwys y cwestiynau o ran gosod amodau o dan baragraff 13 a'r penderfyniad ynghylch lleoliad neilltuedig o dan reoliad 17(1))—

- (a) i'r ceisydd, a
- (b) i unrhyw berson a gyflwynodd sylwadau ar y cais i'r Bwrdd Iechyd Lleol yn unol â pharagraff 8(3).

(2) Yn achos cais a benderfynir o dan reoliad 22 (ceisiadau sy'n ymwneud â newid perchnogaeth), rhaid i Fwrdd Iechyd Lleol, cyn gynted ag y bo'n ymarferol ar ôl gwneud penderfyniad, roi hysbysiad ysgrifenedig yn unol â pharagraff 9.

(3) Rhaid i hysbysiad o benderfyniad o dan y paragraff hwn gynnwys datganiad o'r rhesymau dros y penderfyniad ac o unrhyw hawliau i apelio.

Hysbysu ynghylch penderfyniadau: ceisiadau i gynnwys person mewn rhestrau meddygon fferyllol neu i ddiwygio rhestrau meddygon fferyllol

15.—(1) Rhaid i Fwrdd Iechyd Lleol, cyn gynted ag y bo'n ymarferol ar ôl gwneud penderfyniad ar gais sy'n dod o fewn paragraff 8(1)(a)(ii), roi hysbysiad ysgrifenedig o'i benderfyniad (gan gynnwys y cwestiwn o ran gosod amodau o dan baragraff 13)—

- (a) i'r ceisydd, a
- (b) i unrhyw berson a gyflwynodd sylwadau ar y cais i'r Bwrdd Iechyd Lleol yn unol â pharagraff 8(3).

(2) Rhaid i hysbysiad o benderfyniad o dan y paragraff hwn gynnwys datganiad o'r rhesymau dros y penderfyniad ac o unrhyw hawliau i apelio.

Hysbysu ynghylch penderfyniadau: ceisiadau o dan reoliad 24 i estyn y cyfnod perthnasol

16.—(1) Rhaid i Fwrdd Iechyd Lleol, cyn gynted ag y bo'n ymarferol ar ôl gwneud penderfyniad ar gais sy'n dod o fewn paragraff 8(1)(b), roi hysbysiad ysgrifenedig o'i benderfyniad—

(a) i'r ceisydd, a

(b) i unrhyw berson a gyflwynodd sylwadau ar y cais i'r Bwrdd Iechyd Lleol yn unol â pharagraff 8(3).

(2) Rhaid i unrhyw hysbysiad o benderfyniad o dan y paragraff hwn gynnwys datganiad o'r rhesymau dros y penderfyniad.

Hysbysu ynghylch penderfyniadau: ceisiadau o dan reoliad 17(2)

17.—(1) Rhaid i Fwrdd Iechyd Lleol, cyn gynted ag y bo'n ymarferol ar ôl gwneud penderfyniad ar gais sy'n dod o fewn paragraff 8(1)(c), roi hysbysiad ysgrifenedig o'i benderfyniad—

(a) i'r ceisydd, a

(b) i unrhyw berson a gyflwynodd sylwadau ar y cais i'r Bwrdd Iechyd Lleol yn unol â pharagraff 8(3).

(2) Rhaid i hysbysiad o benderfyniad o dan y paragraff hwn gynnwys datganiad o'r rhesymau dros y penderfyniad ac o unrhyw hawliau i apelio.

Gweithredu yn dilyn penderfyniad mewn cysylltiad â lleoliadau neilltuedig

18.—(1) Ar ôl penderfynu cais o dan reoliad 17(2) neu wneud penderfyniad yn unol â rheoliad 17(1), cyn gynted ag y bo'n ymarferol ar ôl y dyddiad perthnasol, rhaid i'r Bwrdd Iechyd Lleol amlinellu yn fanwl gywir ar fap ffiniau unrhyw leoliad neilltuedig a benderfynwyd ganddo, neu ddileu'r amlinelliad o ffin lleoliad sydd wedi peidio â bod yn lleoliad neilltuedig, yn ôl y digwydd.

(2) At ddibenion y paragraff hwn, “y dyddiad perthnasol” yw'r diweddaraf o'r canlynol—

(a) y dyddiad y mae'r cyfnod ar gyfer dwyn apêl yn erbyn y penderfyniad yn dod i ben, neu

(b) dyddiad penderfynu unrhyw apêl o'r fath.